



# Lajmëtari i Radio Marisë



EDITORIAL

Maj 2014

Viti VI, Nr. 2

## MARIATONA!

Të dashur miq!

Një ndër detyrat që Krishti i ringjallur ua a dha nxënësve të vet është "Dilni në mbarë botën dhe predikonin Ungjillin çdo krijese". Nxënësit e Jezusit që nga fillimi këtë detyrë e kuptuan në thellësi, dhe siç na thonë Veprat e apostujve, duke filluar nga Jerusalemi, e sollën lajmin e Ungjillit deri në kufijtë e skajshëm të tokës.

Këtë gjë e bënë të gjitha breznitë e nxënësve të Jezusit, që nga Ardha e Shpirtit Shenjt e deri në ditën e sotme duke i përdorur të gjitha mjetet e përshtatshme për të sjell Zotin në zemrën e njeriut, sepse ishin të vetëdijshëm se vetëm prania e tij ka mundësi ta ndryshojë Zemrën e tyre.

Apostuj e shpanin përpara njerëzve Jezusin e ngjallur, njerëzit besonin, pagëzoheshin dhe Jezusi që tashmë ishte bërë një me ta përmes mësimit që e kishin predikuar nxënësit shndërroheshin dhe bëheshin nxënës të tij duke marrë përsipër detyrën që të bënin njerëzit tjerë njerëz të shndërruar që besojnë në të mirën dhe i shërbejnë të mirës.

Në kohën tonë, Zoja e bekuar, Nëna e Jezusit dhe Nëna jonë vendosi që tek Biri i saj të afroji shumë njerëz përmes një mjeti në sy të njerëzve krejtësisht të parëndësishëm siç është radioja. Kjo përvojë e re e Ungjillëzimit filloi në një vend krejtësisht të vogël në veri të Italisë, në një fshat që quhet Erba. Në atë vend Zoja filloi të flas përmes radios me bijtë dhe bijat e veta të cilët e dëgjuan zërin e Nënës, i dëgjuan këshillat e saja, filluan ta mbështesin nënën dhe zëri i saj më anën e angazhimit të bijve dhe bijave të saja u bë aq i fuqishëm sa që brenda tre viteve i vizitoi të gjithë bijtë e bijat e veta që nga veriu e deri në jugun e skajshëm.

Jeta e re të cilën Zoja e filloi në bijtë dhe bijat e saja, nuk ishte diçka njerëzore, ishte jetë e re të cilën në zemër e kishte provokuar Shpirti i Zotit të ringjallur, prandaj nuk kishte mundësi të rrinte i mbyllur në një shtet, ose vetëm në një popull. Për këtë arsye, Zoja së pari i vizitoi bijtë e saj që kishte në Zvicër, pastaj filluan t'i vijnë ftesat Zojës që t'i vizitonte bijtë e saj në Amerikën latine, të veriu, shtetet e ndryshme në Afrikë, në Azi, Oqeani si edhe shume shtetet në Evropë. Në secilin vend ku njerëzit ishin dëshirë ta dëgjonin zërin e Zotit, Zoja Radion që e mbart emrin e saj e solli si dhuratë.

Kështu më 19 korrik të vitit 2003 Zoja përmes Radio Marisë e vizitoi edhe popullin tonë duke sjell në zemrat e atyre që e dëgjojnë hirin e Birit

të saj së bashku me jetën e re të njerëzve që filluan jetën e vetë në tërësi t'ia kushtojnë Zotit duke u vendosur me aq sa kanë mundësi në shërbimin e tij. Ky gëzim i papërmbajtshëm që lindi në zemra ishte e pamundur që të rrinte i mbyllur në kufijtë në të cilët padrejtësisht dikush e mbylli popullin tonë. Zoja përmes zërit të Radio Marisë menjëherë filloi të vizitoi dhe të shndërrojë zemrat e bijve dhe të bijave të saja edhe në Kosovë, pastaj përmes internetit edhe në çdo vend të kësaj toke, duke bërë që njerëzit të rilindin dhe t'i ndihmojnë Zojës që tashmë t'i arrinte edhe të gjithë bijtë dhe bijat e saja në të katër anët e botës.

Duke i parë këto nevoja që njerëzit kishin për të dëgjuar në botë fjalën e Zotit përmes valëve të Radios, në Amerikën Latine lindi i deja që një herë në vit t'i ftojme të gjithë dëgjuesit e Radio Marisë që atë gëzim që prej Zojës e morën si dhuratë tua sjellin edhe vëllezërve të vetë që e kërkojnë dhe e dëshirojnë në vendet e pasura dhe të varfra të botës.

Para dy viteve në kongresin botëror që pati Radio Maria është marrë vendimi që për tri vite të gjitha Radio Maritë në botë të Organizojnë Mariatonën - d.m.th. t'i përfshin të gjithë dëgjuesit e Radio Marisë që t'i afrohen më shumë Zojës për ta ndihmuar që më kujdesin e vet amnor t'i arrijë të gjithë bijtë dhe bijat e saja të shpërndarë në mbarë botën. Është përcaktuar që për tre vite të realizohen 11 projekte të reja, 7 në Afrikë, 2 në Azi dhe 2 në Evropë.

Mariatona që vitin e kaluar e Organizuam ishte mrekullia e dashurisë së Zojës së bekuar në zemër të e besimtarëve që dhanë më shumë se kanë dhe e nderuan popullin tonë në mesin e 65 kombësive të botës.

Duke e ditur që çfarë dashurie e madhe fshihet në zemrat tuaja për Zotin jam i bindur se edhe sivjet, do ta gëzojmë edhe më shumë zemrën e Nënës sonë Zojës së Këshillit të mirë, Nënë Terezën dhe Shërbëtoret e Hyjit, pajtorët e Radio Marisë duke bërë që Radio Maria të arri secilin njëri që ka dëshirë dhe të drejtë për ta dëgjuar zërin e Zotit.

Ju ftoj që ta marrim për dore Zojën dhe së bashku t'i vizitojmë famullitë që kemi përcaktuar, që t'i lëvizim të gjithë të dashurit tanë kudo që i kemi në botë që secili ta jap kontributin e vetë për realizimin e këtij projekti të mrekullueshëm. Krishti i ringjallur na bëftë të gjallë që ta realizojmë plani që Zoja Nëna jonë e ka për Radio Marinë.

Don Preka



Ndihmoje Zojën, të të ndihmojë, Zoja!

Në këtë numër:

E DIELA E MËSHIRËS HYJNORE - FESTA E RADIO MARISË NË TIRANË

fq. 2-3

TË GJALLË ME KRISHTIN

fq. 4

## E DIELA E MËSHIRËS HYJNORE - FESTA E RADIO MARISË NË TIRANË

Në fillim dëshiroj t'i shpreh urimet e miya më të përzemërta gjithë stafit të Radio Marisë Shqiptare e në veçanti juve këtu në Tiranë më rastin e festës së Mëshirës Hyjnore. E falënderoj nga zemra don Prekën që më dha mundësinë që të jam këtu dhe të kremtoj këtë meshë së bashku me ju. I përshëndesë të gjithë ata që në këto çaste na përcjellin nëpërmjet valëve të Radio Marisë si në Shqipëri, Kosovë, Mal të zi, por gjithashtu edhe nga diaspora. Për të gjithë ju do të lutem në këtë Eukaristi. Në veçanti lutem për të moshuarit, për të sëmurit, për të vetmuarit. Për të gjithë ata që gjenden në momente të vështira. Të gjithëve ju kujtoj në këtë meshë shenjte. Edhe ju së bashku më neve kushtojani Krishtit të Ringjallur vështirësitë tuaja. Krishti është i gatshëm ti pranoj ato dhe unë jam mesë i bindur së Zotit nuk ik asnjë nga vuajtjet e njerëzimit dhe për secilin vuajtje që bartet më dashuri Ai do të na shpërblej.

Sot Kisha shenjte kremton të dielën e bardhë, të dielën kur tradicionalisht neofitet apo të sapo pagëzuarit merrnin pjesë në Eukaristi më petkat e bardha të marra në pagëzim në vigjiljen e Pashkëve. Sot Kisha kremton edhe festën e Mëshirës Hyjnore, festë kjo që u bë zyrtare për mbarë Kishën nga Papa Gjon Pali i II që sot pas një ore do të shpallet zyrtarisht shenjtë së bashku më Papa Gjonin e XXIII. Është kjo festë shumë e rëndësishme për jetën e besimtarit, sepse na paraqet

fytyrën më të dashur të Zotit. Na paraqet pikërisht karakteristiken kryesore të Hyjit që është mëshira, falja, dashuria dhe mirësia e tij e pakufishme. Në fakt nëse ne vështrojmë ungjillin e në të jetën e Jezu Krishtit neve na paraqitet vazhdimisht kjo mëshirë hyjnore. Kjo mëshirë hyjnore na bëhet e pranishme deri edhe në momentet më të vështira, aty në kryq, ku Krishti i fal salvuesit, e fal cubin e penduar dhe e fal mbarë njerëzimin. Por kjo mëshirë hyjnore vazhdon edhe pas ngjalljes, siç e takojmë edhe në ungjillin e sotshëm që sa po e lexuam dhe tani dëshirojmë ta komentojmë së bashku dhe të marrim gjithë thesarin që rrjedh nga kjo ngjarje ungjillore.

E kemi dëgjuar besoj shumë herë këtë pjesë të ungjillit sipas Gjonit ungjilltar. Ungjilli paraqet dy skena: njëra skenë i takon mbrëmjes së ditës së Pashkëve dhe skena e dytë ajo që ndodhi pas tetë ditëve ku ishte i pranishëm edhe Toma. Ambienti është i mbyllur në krahasim me dukjet apo shfaqjet tjera që Krishti i bënë pas ringjalljes. Erdhi Jezusi,

zuri vend midis tyre dhe u tha: paqja me ju. Sa të mëdha këto fjalë, erdhi Jezusi, zuri vend midis tyre dhe ua dhuroj paqen. Sa fatlumë janë të krishterët sepse Krishti është vazhdimisht në mesin e tyre. Në fakt Ai na ka premtuar se do të jetë më ne deri në të sosur të botës. Pra kjo është një ndër shpresat e ringjalljes së Krishtit. Ai është i gjallë, Ai është në mesin tonë. Vetëdija që Krishti është i ringjallur dhe qëndron në mesin e tyre, pra në mesin e bashkësisë u sjellë paqe dhe gëzim.

Nxënësit janë të frikësuar. Njeriu që nuk e ka takuar Krishtin e ringjallur është ende në errësirë. Errësira sjellë frikën, dyshimin, paqartësinë. Po të pyesim vetveten se cila është frika më e madhe e apostujve, apo e nxënësvë të tij?

1. Pa dyshim frika më e madhe është ajo e vdekjes. Kanë frikë nga vdekja. Kanë qenë dëshmitarë të vdekjes së mësuesit të tyre dhe tani kanë frikë për vdekjen e vet. Takimi me Krishtin e largon frikën, edhe frikën me të madhe nga vdekja. Sepse Krishti e ka mposhtur vdekjen, e ka mposhtur mëkatën, e ka mposhtur djallin. Të gjithëve na i ka hap dyert e parajsës. Na i ka hap dyert e jetës së amshueshme. Ju kisha ftuar të gjithë ata që kanë frikë nga vdekja atëherë të mbështetën në parzmën e Krishtit dhe tek ai të gjejnë shpresën e ringjalljes. Por ndoshta kemi mundësi të mendojmë edhe në një

vdekje tjetër. E kam fjalën për vdekjen në mëkatet tona. Edhe në këtë rast duhet të largojmë frikën. Sot është festa e mëshirës hyjnore. Të pendohemi e Krishti është i gatshëm të pranoj kthimin tonë.

2. Frika e dytë është frika nga konfrontimi apo takimi më ata që nuk e pranuan Krishtin. Kjo arsye i mbante të mbyllur apostujt. Si të ballafaqohen me ata njerëz që e dënuan Mësuesin e tyre, të cilin këta e kishin ndjekur për më shumë se tri vite. Si duket kishin harruar se Krishti u kishte thënë dikur: po ju dërgoj si qengja midis ujqish. Kjo mund të jetë edhe frika e jonë. Që të mbyllemi në komoditetin tonë dhe mos të kemi guxim të shpallim të vërtetën dhe të ballafaqohemi më ata që edhe sot e kësaj dite nuk e pranojnë Krishtin. Nuk jemi të vetëdijshëm sa bota dhe njerëzit janë të etshëm për më dëgjua fjalën e Zotit, për më dëgjua për jetën dhe shembullin e Jezu Krishtit.

Por në këtë ngjarje ungjillore protagonist së bashku më Krishtin bëhet edhe Toma, ai që quhej binjak (didimos). Sigurisht u quajt binjak





sepse është binjaku ynë, të cilit shpesh herë ne të gjithë i përngajmë sa herë që kemi vështirësi të besojmë në Krishtin e ringjallur. Por kjo figurë shumë interesante shpesh herë kuptohet në mënyrë sipërfaqësore dhe mendohet se është personi tipik që nuk beson. Por nëse e marrim parasysh të kaluarën e tij duhet të themi që ai është një apostull që dëshiron të kuptoj më shumë për ngjalljen e Krishtit. Në fakt për Shën Tomën në ungjillin sipas Gjonit flitet krejt tri herë. Në një vend ne dëgjojmë zërin e Tomës që thotë të shkojmë edhe ne të vdesim më Krishtin në Jude. Pastaj në darkën e mbrame kur Krishti flet për shkuarjen e tij nga kjo botë, në atë moment e dëgjojmë një intervenim të Tomës që thotë: po si mund ta dimë ne rrugën. E pastaj vjen ajo përgjigja e famshme e Jezusit: unë jam rruga e vërteta dhe jeta. Dhe të tretën herë e gjejmë në këtë pjesë që sapo e lexuam dhe që vërtetë e bënë Tomën një personazh të pahar-rueshëm.

Po edhe një pyetje do të jetë legjitime për ne: po ku ishte Toma ditën e Pashkëve në mbrëmje? Pse nuk ishte në mesin të Dymbëdhjetëve? Duket së është distancuar përkohësisht nga bashkësia. Ndoshta edhe shpresat e tij në ngjallje janë dobësuar. Mund të jetë kjo një arsye e mungesës së tij në mesin e bashkësisë. Mu më shkojnë tani ndërmend shumë njerëz, shumë besimtarë që për arsye të ndryshme janë larguar edhe pse vetëm përkohësisht nga Kisha, qëndrojnë larg Kishës, larg sakramenteve, larg pjesëmarrjes në dhuratat e që Zoti na jep nëpërmjet Kishës shenjtë. E pra nëse kthehemi në ungjill tek figura e Shën Tomës atëherë kuptojmë së Toma vetëm pas kthimit të tij në bashkësi ju mundësua të takoj Krishtin e ringjallur. Edhe Krishti deshi që vërtetë ti zbulohet Tomës brenda bashkësisë. Është brenda Kishës, pra brenda bashkësisë që ne e përjetojmë Krishtin e ringjallur, edhe pse ndoshta mund të mos pëlqej prifti, apo kisha, apo ndonjë vëlla besimtarë. Por është e domosdoshme të qenurit tonë brenda Kishës.



Vëllezërit e tjerë i thonë Tomës: e kemi parë Zotërinë. Ja zëri, ja dëshmia e bashkësisë. Kjo duhet të jetë edhe dëshmia e jonë. E kemi parë, e kemi takuar Krishtin. Për ne është e pamundur ta shohim fizikisht, por na është bërë e mundur ta takojmë Krishtin në Eukaristi, ta takojmë në mënyrë sakramentale, ta takojmë dhe ta shohim me sytë e fesë dhe të besimit. Ja pra vëllezër e motra, Toma që ka vështirësi të besojë, ai i cili kishte dyshime më në fund arrit të dëshmojë fenë e vërtetë dhe të pastër në Krishtin e Ringjallur.

Duhet patjetër të theksohet edhe një gjë. Krishtin e njohin nëpërmjet disa shenjave. Këto shenja janë shumë të pranishme në ungjillin pas ringjalljes, por edhe në këtë pjesë të ungjillit: vendi i gozhdave, kraharori etj. Por ungjilli i sotshëm përfundon duke thënë se Jezusi bëri edhe shumë mrekulli tjera ndër sy të nxënësvë të vet, të cilat nuk u shkruan në këtë libër. Krishti vazhdon të bëjë mrekulli edhe sot në Kishën vet. Krishti vazhdon të na dërgoj shenja të vlefshme për ta njohur Atë dhe për ta pranuar në jetën tonë. Shenja shumë të vlefshme është jeta e dy papëve që pas pak do të ngritën nga Papa Françesku në piedestalin më lartë, në nderimin më të lartë të kishës, pra do të shpallën shenjtër. Do të nderohen në altar dhe të vihen si shembull i jetësimit të virtyteve në mënyrë heroike. Dhe gjithashtu do të kemi të gjithë mundësinë që edhe këtyre dy figurave tu drejtohem më lutjet tona që të ndërmjetësojnë për Kishën dhe për mbarë njerëzimin.

Është folur shumë për këto dy figura. Nuk dua të shtoj asgjë tjetër veçse të kujtoj edhe njëherë vetvetes edhe të gjithë juve fjalët e Papa Gjon Pali II që ju drejton të rinjve me një rast: Mos keni frikë t-ia hapni dyert Krishtit. Le të jetë edhe për ne sot kjo fjalë si një frymëzim për ta njohur, pranuar dhe dëshmuar Krishtin e ringjallur. Amen.

**Don Jeton Thaqi**



# TË GJALLË ME KRISHTIN

Të dashur vëllezër dhe motra, jam shumë i lumtur për këtë kremtim të mrekullueshëm të të Kremtes së Mëshirës Hyjnore. Ty që more pjesë në këtë Meshë të shenjtë Zoti deshi të të zhyset në Mëshirën e tij. Falënderoj secilin prej jush që pranuat ftesën e Mëshirës Hyjnore dhe morët pjesë në Mëshirën e tij. Sikurse mua, sot Zoti më pasuroi me Mëshirë përmes jush, jam thellë i bindur se me Mëshirë na mbushi përmes Don Jetonit, dhe do të ishte e mrekullueshme po të kishim mundësi atë fjalë të cilën Zoti na e tha përmes tij ta marrim si thesar të jetës sonë, është fjala e Zotit që përcjell si reja Popullin e zgjedhur drejt Tokës së premtuar

E falënderoj Don Jetonin që erdhi, sepse pothajse të gjithë ipeshkvijnitë i kam thirrur që të jenë në këtë festë, por nuk mundën për arsye se shumica prej tyre janë në Romë për të marrë pjesë në shenjtërimin e dy papëve.

Mons Gjergj Frenco, i cili gjithmonë vjen me gëzim nuk pati mundësi të vinte, sepse sot ka 50 pagëzime në Katedralen e Shën Palit në Tiranë. Atë Prelë Gjurashtaj famullitari ynë pati dy meshë të tjera, pas shumë thirrjeve, Zoti gjeti Don Jetonin që mbërmë erdhi nga Prishtina me Don Robertin, të cilin gjithashtu e falënderoj që erdhi për tu gëzuar më ne sot në ditën e Mëshirës Hyjnore.

Vëllezër dhe motra, e kremtja e sotme është një e kremte e mrekullueshme, dhe do të duhej që ky vend të vlonte prej njerëzve. Në botë atje ku kremtohet Mëshira Hyjnore shkojnë me miliona njerëz. Pse? Sepse besojnë në mëshirë. E bota nuk ka nevojë për asgjë tjetër më shumë se sa për mëshirë. Është mëshira të cilën Zoti na dhuron, të cilën e dimë që e kemi marrë nëse ua japim të tjerëve. Prandaj ju ftoj që prej ditës së sotme, që nga e kremtja Mëshirës Hyjnore, ju që morët pjesë në këtë Meshë ta zbatoni Mëshirën, që Zoti përmes don Jetonit na tha se Shën Toma jo që nuk ka besuar në Krishtin por deshi të dijë më shumë për të. Shën Toma pati faj pse nuk u besoi apostujve, pati të gjitha arsyet që të mos besonte në atë çka apostujt i thonin. Pse? Nëse Krishti është ngjallur, përse rri në mbyllur, pse jeni të zymtë, pse nuk gëzoni. Prandaj, duke u thënë "nuk besoj pa e prek vet", u tha: unë vet dua të di më shumë për Krishtin.

Vëllezër dhe motra, edhe ne duam të dimë më shumë për Krishtin. Kjo është dëshira e pashtershme në zemrën çdo njeriu, të dijë më shumë për Krishtin. Të lumët ju që këtë dëshirë e keni realizuar sot. Jam i sigurt se ju sot dini më shumë për Krishtin, për Krishtin e Mëshirshëm, prandaj ky takim është një mrekulli e vërtetë, është një mrekulli ndoshta më e madhe se shumë festa të Radio Marisë që bëhen në shumë vende të tjera, sepse ju shoh nga shumë vende të Shqipërisë dhe jashtë saj, siç nuk ju pashë ndonjëherë tjetër. Ja, vëllezër dhe motra kjo është bashkësia e Krishtit të gjallë, të cilën Ai është duke ndërtuar përmes Radio Marisë. Kjo është bashkësia e vëllezërve dhe motrave. Dje në shenjtëroren e Zojës së Këshillit të Mirë në Shkodër shumë vetë me thanë: Don Prekë, organizoj autobusët... U thashë jo. Nuk është më koha që prifti duhet t'i bëjë të gjitha, ai duhet bërë punën e vet, duhet ta predikojë Fjalën e Zotit... ndërsa ju e keni për detyrë që Fjalën e Zotit ta mundësoni të arrijë tek çdo njeri. E ju këtë fuqi, e keni vëllezër dhe motra. Zoti ju dha mundësitë, por është e

nevojshme t'i zbuloni në zemrën, në shpirtin tuaj. Ju që jeni nga Tirana, e jani e ndihmoni. Mos mendo, "po çka mund të bëj unë" sepse ju keni dije dhe mundësi më të madhe se cilido prej dymbëdhjetë apostujve që Krishti zgjodhi. Ju jeni të fuqishëm pikërisht pse Krishti ju zgjodhi edhe ju. Por çka duhet të bëjmë? Duhet vetëm të braktisim në dorën e Krishtit të mëshirshëm, atëherë do të shihni se çfarë ka për të bërë Mëshira Hyjnore përmes teje.

Vëllezër dhe motra, Krishti nuk ka nevojë vetëm për ju që jeni në Kishë, por ka nevojë edhe për të gjithë ju që jeni duke e dëgjuar Radio Marinë. Pa ju, Fjala e Zotit do të jetë më e zbehtë, do të shpallet me vështirësi të madhe. Nuk do Zoti as Zoja të mbështetet vetëm tek një njeri. Përse? Sepse ai do të na angazhojë të gjithëve që kjo vepër e Hyjtit, Radio Maria të jetë e të gjithëve. Zoja do që gjithsecili prej nesh, shpalljen e Ungjillit ta mbështes me përpjekjen dhe mundin personal. Përse? Sepse Zoti do, që përmes bekimit që ju bën ju dhe familjeve tuaja të bekojë secilin njeri në skajin më të largët të tokës. Ai do që ti të jesh shtyllë e fort në shpalljen e Lajmit të gëzueshëm. Prandaj ju ftoj që ta ndihmojmë Zojën që të na ndihmojë Zoja.

Jemi pothuajse në fillimin e muajit maj në të cilin e fillojmë Mariatonën. Maratona është një ngjarje të cilën nuk e bëjmë vetëm ne por e bëjnë edhe 70 Radio Maritë në botë. Zoja i fton të gjithë ata që besojnë në Krishtin që ta japin kontributin e vet që në 11 shtete ku më miliona njerëz kërkojnë ta dëgjojnë Fjalën e Zotit ta marrin dhuratë Radio Marinë siç e morëm ne. Vitin e kaluar pa asnjë mburrje të treme, miqtë dhe bamirësit e Radio Marisë nga Shqipëria dhe Kosova sipas përqindjes së popullsisë dhe sipas dhuratës së dashurisë ishin në vendin e parë në botë. Pse? Sepse jemi të pasur? Jo vëllezër dhe motra, por sepse duam Zotin që gëzuar zemrat tona, e tani këtë gëzim ne duam tua japim njerëzve të tjerë. Mos u ndal secilën ditë të këtij muaji, në emër të Zotit trokitni në zemrat e njerëzve, trokitni dhe do të shihni vëllezër dhe motra ju vet se sa e madhe është feja e juaj, sa e fortë është dashuria e juaj për Zotin dhe për Fjalën e tij. Për mrekullinë e madhe të fesë suaj do të dëgjoni në përfundimin e Mariatonës, atëherë do shihni se përsëri dashuria jonë për Zotin do t'i tejkalojë të gjitha pritjet. Po, kjo është bindja që kam në zemër për ju. Në një mbledhje me drejtorët e RM, ata më pyetën se si ja kemi dalë kësaj pune me një popull të varfër. Nuk ia dola unë, sepse thënë të vërtetën, unë jam më i padishur dhe më i keqji ndër të gjithë. Por i thash Zojës: "Zojë unë dua filloj, por ti më pri, ti më dorën tënde të butë trokit në zemrat e njerëzve, trokit ti në zemrat e bijve dhe bijave të tua. Zoja filloj të trokas, ajo e kreu punën e mrekullueshme në zemrat tona".

Vëllezër dhe motra ne i kemi 40 martirë që janë duke pritur që sa më parë mbarë Kisha t'i nderoj në altar. Secilit prej tyre vitin e kaluar na dhuroj më shumë se 100000 lek të reja, sivjet prej secilit prej tyre kërkoj 200000. Sivjet jemi më të fort në besim, jemi rritë, besojmë më shumë në forcën që kanë para Zotit

Një gjë mos e harro, Zoti vepron përmes mej dhe përmes teje, mos gabo të flasësh më të tjerët pa e përfshi veten, sepse s'të beson askush. Jepe ti pjesën tënde që ta japin pjesën e vetë ata të të cilët Zoti të çon. Zoti e do lëmoshën tënde, por mos harro se më shumë se atë lëmoshë të do ty, e do zemrën dhe jetën tënde. Hyji ka nevojë për ty. Provonni Mëshirën Hyjnore, vëni në provë besimin tuaj në Zotin. Jep diçka që të kushton shumë dhe brenda muajit maj nëse nuk të kthehet dhjetë në jetën tënde dhe të familjes sate mos jepni kurrë më, dijeni se ju kam gënjyer. Një gjë mos e harro jepja Zotit ashtu si do Zoti e nëse Zoti vepron mos rri më larg tij. Prandaj, vëllezër dhe motra të gjithëve, ju thërras të tregoni në mënyrë konkrete se ju besoni në Krishtin e gjallë.

Po kush beson në Krishtin e gjallë? Besimtari që bashkë me Krishtin ringjallët çdo ditë, ai që është i gjallë, d.m.th. që vepron me Atë në të cilin beson Nëse ti ende nuk bërë asgjë që Fjala e Hyjtit të shpallet, që dashuria e Hyjtit t'i përfshi zemrat e njerëzve, si mendon, a je i gjallë apo je i vdekur. Ju ftoj të gjithëve, tregoni se jeni të gjallë. Pa që tani dua tu them: ne vërtetë ne jemi të gjallë, sepse ne besojmë në Zotin e gjallë që na mblodhi këtu dhe na dhuroj Mëshirën që çdo ditë do ta çojmë si dhuratë nga famullia në famulli së bashku me të gjithë dëgjuesit kudo në botë, në muajin maj në Shqipëri ndërsa në fillim të muajit qershor në Kosovë. Kjo do të jetë dhurata jonë përbashkët që përmes duarve të Nënës sonë do ia japim si mbështetje Familjes Botërore. Ju ftoj të gjithëve që në shpirt, çdo ditë të ma jti maj kur të zgjoheni nga gjumi t'i thoni Zojës: 'dua ta them një Ati ynë dhe një të Falemari Mari që t'i hapësh zemrat e të gjithë njerëzve që fuqia e Fjalës së Birit tënd e Zotit tonë Jezu Krishtit të përhapet në ato vende që e presin Radio Marinë'. Ndërsa aty ku jetojmë të angazhoheni, t'i mbledhim njerëzit e dashur, që ta bëjmë një festë të madhe për Krishtin.

Më 8, 9 dhe 10 do të jemi në Shkodër, Bajzë, Lezhë, Tiranë, Durrës, Gjakovë dhe Prishtinë.

Në famullitë e tjera, Rranxa Bushat; Trush; Balldre; Rragam, Ashtë, Dajç i Bregut Bunës, Grudë e Re, Kamëz, Jubicë, Gur i Ri; Dejë; Stajkë, Shëldi, Kopluk, Tuz, Pistull, Grash do të jetë programi i drejtpërdrejt nga ora 17-18 adhurimi e në orën 18 Mesha e shenjtë.

Qëllimi i lutjes gjatë Mariatonës është mbrojtja e familjeve tona, për familjet që janë në krizë. Pastaj dhurata jonë për Radio Marinë në botë. Ju falënderoj që këtë gëzim dhe dashuri të Zorit do e sjellni në familjet tuaja. U takofshim gjithmonë në gëzimin e Krishtit të Ringjallur. Amen.

Don Preka

**Lajmëtar i Radio Marisë**  
është organ i  
Shoqatës Radio Maria.

Tiranë

Rr. Papa Gjon Pali II, Nr. 4  
Fushë Kërçik, Babrru, Paskuqan  
Tiranë, Shqipëri  
+355 4 2 346 346

Shkodër

Sheshi Papa Gjon Pali II  
Shkodër, Shqipëri  
+355 22 24 08 52

Lezhë

Sheshi Besëlidhja  
Lezhë, Shqipëri  
+355 215 24 970

E-mail: [info@alb.radiomaria.org](mailto:info@alb.radiomaria.org)  
Facebook: Radio Maria Albania  
Përgjegjës: Don Prekë Lazraj

**Radio Maria,**  
**Hiri i Hyjtit në shtëpinë tënde,**  
**mund të dëgjohet në:**

Rrëshen e rrethina  
FM 100.7 MHz  
Tiranë, Durrës, Kavajë, Berat  
FM 91.4 MHz  
Shkodër, Podgoricë, Ulqin  
FM 102.2 MHz  
Lezhë, Laç të Kurbinit, Mamurras  
FM 89.6 MHz  
Pukë, Fushë Arrëz, Tropojë,  
Kukës dhe Kosovë  
FM 90.0 MHz  
në internet  
[www.radiomaria.al](http://www.radiomaria.al)

**PRO CREDIT BANK**

**INTESA SANPAOLO BANK**

**NË ZVICËR**

LLOGARIA NË **EURO 600388970102**  
Kodi SWIFT: FEFAALFR  
IBAN: AL45209516090000600388970102

LLOGARIA NË **LEK 600388970001**  
Kodi SWIFT: FEFAALFR  
IBAN: AL56209516090000600388970001

LLOGARIA NË **EURO 1043631803**  
Kodi SWIFT: USALALTR  
IBAN: AL25208110080000001043631803

LLOGARIA NË **LEK 1043631801**  
Kodi SWIFT: USALALTR  
IBAN: AL 79208110080000001043631801

Verein Freunde vom albanischen  
Radio Maria

Appenzeller Kantonalbank

Konto: **90-125-8**

IBAN:  
CH86 0076 3000 1157 2414 5